

**BOSNA I HERCEGOVINA
FEDERACIJA BOSNE I HERCEGOVINE
VLADA**

PRIJEDLOG

**Z A K O N
O UPRAVLJANJU DRŽAVNIM KAPITALOM U
PRIVREDNIM DRUŠTVIMA U FEDERACIJI BOSNE I HERCEGOVINE**

Sarajevo, maj 2012. godine

Z A K O N
O UPRAVLJANJU DRŽAVNIM KAPITALOM U
PRIVREDNIM DRUŠTVIMA U FEDERACIJI BOSNE I HERCEGOVINE

I – OPŠTE ODREDBE

Član 1.

Ovim zakonom uređuje se: upravljanje državnim kapitalom, osnivanje, vršenje ovlaštenja po osnovu učešća državnog kapitala, administrativna kontrola akata i posebne odredbe o postupku u registrima i to isključivo u privrednim društvima sa učešćem državnog kapitala koja su u nadležnosti Federacije Bosne i Hercegovine.

Član 2.

U Federaciji Bosne i Hercegovine ovlaštenja po osnovu učešća državnog kapitala u privrednim društvima vrši Federacija Bosne i Hercegovine, kantoni, gradovi i opštine u okviru svojih nadležnosti.

U privrednim društvima sa učešćem državnog kapitala u kojim ovlaštenja po osnovu učešća državnog kapitala vrše opštine, gradovi i kantoni, vršenje ovlaštenja po osnovu učešća državnog kapitala svojim propisima uređuju opštine, gradovi i kantoni Federacije Bosne i Hercegovine (u daljem tekstu: drugi nivoi vlasti), svako u okviru svojih nadležnosti.

Član 3.

Pojedini pojmovi u smislu ovog zakona imaju slijedeće značenje:

- **organi Federacije Bosne i Hercegovine** su Vlada Federacija Bosne i Hercegovine i federalni organi uprave definisani Zakonom o organizaciji organa uprave u Federaciji Bosne i Hercegovine („Službene novine Federacije BiH“, broj 35/05),
- **privredno društvo sa učešćem državnog kapitala** je privredno društvo u kojem ovlaštenja po osnovu učešća državnog kapitala vrše organi Federacije Bosne i Hercegovine, bez obzira na visinu tog učešća,
- **privredno društvo sa većinskim učešćem državnog kapitala** je privredno društvo u kojem ovlaštenja po osnovu učešća državnog kapitala vrše organi Federacije Bosne i Hercegovine i u čijem osnovnom kapitalu državni kapital učestvuje sa više od 50%,
- **vršenje ovlaštenja po osnovu učešća državnog kapitala** obuhvata ostvarivanje prava dioničara ili članova privrednih društva sa učešćem državnog kapitala u skladu sa propisima koji uređuju prava i obaveze dioničara i članova privrednih društava;
- **administrativna kontrola akata** je postupak kontrole usklađenosti odgovarajućih akata privrednih društava sa većinskim učešćem državnog kapitala sa zakonima i podzakonskim aktima;
- **registri** su Registar poslovnih subjekata koji vode nadležni registarski sudovi u Federaciji Bosne i Hercegovine, Registar vrijednosnih papira u Federaciji Bosne i Hercegovine i drugi registri u kojim se evidentiraju podaci o privrednim društvima.

II – VRŠENJE OVLAŠTENJA U PRIVREDNIM DRUŠTVIMA SA UČEŠĆEM DRŽAVNOG KAPITALA

1. Osnivanje i način vršenja ovlaštenja u privrednim društvima sa učešćem državnog kapitala

Član 4.

Privredno društvo sa 100% učešćem državnog kapitala može se osnovati posebnim zakonom.

Vlada Federacije Bosne i Hercegovine odlukom može osnovati privredno društvo sa 100% učešćem državnog kapitala kada ocjeni da je osnivanje takvog privrednog društva od interesa za Federaciju Bosne i Hercegovine ili za poslovanje privrednih društava sa učešćem državnog kapitala.

Član 5.

U privrednim društvima sa učešćem državnog kapitala iz nadležnosti Federacije Bosne i Hercegovine, ovlaštenja po osnovu učešća državnog kapitala vrši Vlada Federacije Bosne i Hercegovine neposredno ili putem federalnih organa uprave, ukoliko posebnim zakonom nije drugačije određeno.

U privrednim društvima sa učešćem državnog kapitala, organi Federacije Bosne i Hercegovine vrše ovlaštenja po osnovu učešća državnog kapitala u skladu sa Strategijom i Planom upravljanja državnim kapitalom u privrednim društvima iz nadležnosti Federacije Bosne i Hercegovine (u daljem tekstu: Strategija i Plan upravljanja).

Član 6.

Strategijom se određuju srednjoročni ciljevi i smjernice upravljanja državnim kapitalom u privrednim društvima iz nadležnosti Federacije Bosne i Hercegovine uvažavajući ekonomske, razvojne i druge interese Federacije Bosne i Hercegovine.

Strategiju donosi Parlament Federacije Bosne i Hercegovine na prijedlog Vlade Federacije Bosne i Hercegovine za period od najmanje deset godina.

Član 7.

Planom upravljanja određuju se kratkoročni ciljevi i smjernice upravljanja državnim kapitalom u privrednim društvima iz nadležnosti Federacije Bosne i Hercegovine i mjere za provođenje Strategije.

Plan upravljanja donosi Vlada Federacije Bosne i Hercegovine za period od četiri godine.

Organi Federacije Bosne i Hercegovine koji vrše ovlaštenja po osnovu učešća državnog kapitala u privrednim društvima sa učešćem državnog kapitala iz nadležnosti Federacije Bosne i Hercegovine dužni su do 30. aprila tekuće godine dostaviti Vladi Federacije Bosne i Hercegovine Izvještaj o relizaciji Plana upravljanja za prethodnu godinu.

Izvještaj o realizaciji Plana upravljanja Vlada Federacije Bosne i Hercegovine dostavlja Parlamentu Federacije Bosne i Hercegovine.

Član 8.

Nacrt Strategije i prijedlog Plana upravljanja utvrđuje komisija sastavljena od predstavnika organa Federacije Bosne i Hercegovine koji vrše ovlaštenja po osnovu učešća državnog kapitala u privrednim društvima sa učešćem državnog kapitala, a za članove komisije mogu se imenovati i univerzitetski profesori, privrednici i drugi istaknuti stručnjaci iz odgovarajućih oblasti.

Komisiju iz stava 1. ovog člana imenuje Vlada Federacije Bosne i Hercegovine.

Obavezan sadržaj Strategije i Plana upravljanja, sastav komisije, vrijeme na koje se komisija imenuje, naknada za rad komisije i druga pitanja u vezi sačinjavanja nacrta Strategije i prijedloga Plana upravljanja bliže se uređuje propisom koji donosi Vlada Federacije Bosne i Hercegovine.

Član 9.

Vlada Federacije Bosne i Hercegovine odlukom utvrđuje listu privrednih društava iz nadležnosti Federacije Bosne i Hercegovine u kojim ovlaštenja po osnovu učešća državnog kapitala vrše organi Federacije Bosne i Hercegovine (u daljem tekstu: Lista).

Vlada Federacije Bosne i Hercegovine, odlukom o izmjeni odluke iz stava 1. ovog člana, može vršenje ovlaštenja po osnovu učešća državnog kapitala u privrednom društvu iz nadležnosti Federacije Bosne i Hercegovine prenijeti na drugi nivo vlasti, uz obavezno pribavljanje prethodne saglasnosti Parlamenta Federacije Bosne i Hercegovine i nadležnog organa nivoa vlasti na koji se ovlaštenja prenose.

Vlada Federacije Bosne i Hercegovine, posebnom odlukom o dopuni odluke iz stava 1. ovog člana, može vršenje ovlaštenja po osnovu učešća državnog kapitala u privrednom društvu iz nadležnosti drugih nivoa vlasti prenijeti u nadležnost Federacije Bosne i Hercegovine, uz obavezno pribavljanje prethodne saglasnosti Parlamenta Federacije Bosne i Hercegovine i nadležnog organa nivoa vlasti sa kojeg se ovlaštenja prenose.

Odlukom o izmjeni odluke iz stava 1. ovog člana, Vlada Federacije Bosne i Hercegovine može privredno društvo brisati sa Liste, ukoliko je privredno društvo prestalo postojati ili je u cijelosti privatizovano.

Odluke iz st. 2. i 3. ovog člana Vlada Federacije Bosne i Hercegovine može donijeti ukoliko prethodno utvrdi da je prenos vršenja ovlaštenja po osnovu učešća državnog kapitala u privrednom društvu od interesa za Federaciju Bosne i Hercegovine, drugi nivo vlasti ili za poslovanje privrednih društava sa učešćem državnog kapitala.

Član 10.

Lista iz člana 9. ovog zakona, za svako privredno društvo sadrži slijedeće podatke:

- firmu i sjedište,

- visinu učešća državnog kapitala u osnovnom kapitalu privrednog društva izraženu u postotcima, a za privredna društva organizovana u obliku dioničkog društva izraženu i u broju dionica,
- broj članova nadzornog odbora i uprave,
- visinu naknada i plaća članova nadzornog odbora i uprave izraženu u broju prosječnih mjesečnih neto plaća isplaćenih u Federaciji Bosne i Hercegovine u prethodna tri mjeseca prema posljednjem objavljenom podatku Federalnog zavoda za statistiku,
- naziv organa Federacije Bosne i Hercegovine koji vrši ovlaštenja po osnovu učešća državnog kapitala u tom privrednom društvu,
- i drugo.

2. Odlučivanje na skupštini

Član 11.

Pravo učestvovanja u radu i odlučivanju skupštine privrednog društava sa učešćem državnog kapitala organi Federacije Bosne i Hercegovine ostvaruju putem punomoćnika koji je u svemu dužan postupati u skladu sa dobijenim pismenim obavezujućim uputstvima organa Federacije Bosne i Hercegovine koji u skladu sa Listom vrši ovlaštenja po osnovu učešća državnog kapitala u tom privrednom društvu (u daljem tekstu: nadležni organ Federacije).

Član 12.

Organ Federacije Bosne i Hercegovine koji pravo učestvovanja u radu i odlučivanju skupštine privrednog društava sa učešćem državnog kapitala ostvaruje putem punomoćnika, za svaku sazvanu skupštinu punomoćniku daje punomoć u pisanoj formi, koja obavezno sadrži:

- naziv i sjedište davaoca punomoći/organa Federacije Bosne i Hercegovine koji putem punomoćnika ostvaruje ovlaštenja u radu i odlučivanju skupštine privrednog društva,
- ime i prezime punomoćnika, ime jednog roditelja, adresa stanovanja, JMB, broj lične karte i naziv organa koji je izdao ličnu kartu,
- dnevni red sazvane skupštine sa obavezujućim uputstvom o načinu glasanja po svakoj pojedinoj tački dnevnog reda, tako da pored svake tačke dnevnog reda mora izričito biti navedeno: „glasati za” ili „glasati protiv” ili „biti suzdržan” ili „ne glasati” ili drugi odgovarajući način glasanja,
- druga odgovarajuća obavezujuća uputstva koja se odnose na učestvovanje u raspravi,
- naznaku da punomoćnik nema ovlaštenje da učestvuje u radu i odlučivanju sazvane skupštine izvan tačaka dnevnog reda navedenog u punomoći,
- broj, mjesto i datum izdavanja punomoći,
- potpis punomoćnika i
- potpis rukovodioca i pečat organa Federacije Bosne i Hercegovine.

Član 13.

Privredno društvo sa učešćem državnog kapitala dužno je nadležnom organu Federacije dostaviti poziv za zakazanu skupštinu sa dnevnim redom i materijalima za

svaku tačku dnevnog reda, najkasnije do dana objavljivanja obavještenja o sazivanju skupštine.

Punomoć za učešće u radu i odlučivanju skupštine društva dostavlja se privrednom društvu sa učešćem državnog kapitala putem pošte, faksa ili elektronske pošte, najkasnije tri dana prije dana održavanja skupštine.

Punomoćnik je dužan originalni primjerak punomoći predati nadležnom organu privrednog društva, najkasnije neposredno prije početka skupštine.

Ukoliko punomoć ne sadrži bilo koji dio obaveznog sadržaja iz člana 12. alineja 1. do 8. ovog zakona punomoćnik ne može učestvovati u radu i odlučivanju skupštine.

Član 14.

Nadležni organ Federacije koji je dao punomoć za učestvovanje u radu i odlučivanju skupštine privrednog društava sa učešćem državnog kapitala, može opozvati punomoć ili umjesto već date punomoći dati novu punomoć najkasnije do održavanja skupštine.

3. Nadzorni odbor

Član 15.

Izbor kandidata za imenovanje članova nadzornih odbora ispred državnog kapitala vrši se u skladu sa odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03).

Postupak iz stava 1. ovog člana provodi komisija imenovana od nadležnog organa Federacije.

Komisija iz stava 2. ovog člana, nakon okončanog postupka izbora sačinjava listu najuspješnijih kandidata, na osnovu koje rukovodilac nadležnog organa Federacije, Vladi Federacije Bosne i Hercegovine upućuje prijedlog za utvrđivanje prijedloga kandidata za članove nadzornog odbora ispred državnog kapitala.

U skladu sa prijedlogom koji utvrdi Vlada Federacije Bosne i Hercegovine, imenovanje članova nadzornih odbora ispred državnog kapitala vrši skupština privrednog društva.

Član 16.

Izuzetno, bez provođenja postupka iz člana 15. ovog zakona, Vlada Federacije Bosne i Hercegovine, na prijedlog nadležnog organa Federacije, može utvrditi prijedlog kandidata za članove nadzornog odbora ispred državnog kapitala koji se imenuju do okončanja postupka iz člana 15. ovog zakona, a najduže na period do šest mjeseci.

Vlada Federacije Bosne i Hercegovine može vršiti utvrđivanje prijedloga kandidata u skladu sa stavom 1. ovog člana ukoliko ocjeni da je to potrebno radi obezbijeđenja uslova za nesmetan rad i odlučivanje nadzornog odbora privrednog društva do okončanja postupka iz člana 15. ovog zakona.

U skladu sa prijedlogom kandidata iz stava 1. ovog člana, imenovanje članova nadzornih odbora ispred državnog kapitala vrši skupština privrednog društva do okončanja postupka iz člana 15. ovog zakona, a najduže na period do šest mjeseci,

počev od dana stupanja na snagu odluke skupštine o imenovanju članova nadzornog odbora.

Član 17.

Kandidat za člana nadzornog odbora privrednog društva ispred državnog kapitala iz čl. 15. i 16. ovog zakona ne može biti lice:

- za čiji izbor i imenovanje postoje smetnje utvrđene važećim propisima koji regulišu ovu oblast i
- koje je zaposlenik tog privrednog društva, osim u slučaju kada Vlada Federacije Bosne i Hercegovine utvrdi da je to od posebnog interesa za određeno privredno društvo, a što zavisi od djelatnosti koju privredno društvo obavlja.

Kandidat za člana nadzornog odbora privrednog društva ispred državnog kapitala iz čl. 15. i 16. ovog zakona mora imati najmanje završeno visoko obrazovanje (VSS) i najmanje pet godina radnog iskustva u struci nakon završenog visokog obrazovanja.

Aktom o osnivanju i/ili statutom privrednog društva sa učešćem državnog kapitala može se utvrditi potrebno stručno zvanje i iskustvo, a mogu biti utvrđeni i dodatni uslovi za članstvo u nadzornom odboru tog privrednog društva.

Član 18.

U privrednim društvima u kojim učešće državnog kapitala nije većinsko, član nadzornog odbora imenovan ispred državnog kapitala dužan je redovno, a najmanje jednom u tri mjeseca, dostaviti pismeni izvještaj o radu nadzornog odbora nadležnom organu Federacije.

U privrednim društvima sa većinskim učešćem državnog kapitala, pismeni izvještaj iz stava 1. ovog člana usvaja nadzorni odbor tog privrednog društva, a nadležnom organu Federacije izvještaj dostavlja predsjednik nadzornog odbora.

Član 19.

Razrješenje dužnosti prije isteka mandata jednog, više ili svih članova nadzornih odbora privrednih društava imenovanih ispred državnog kapitala vrši skupština privrednog društva na osnovu prethodne saglasnosti Vlade Federacije Bosne i Hercegovine.

Vlada Federacije Bosne i Hercegovine može dati prethodnu saglasnost iz stava 1. ovog člana u slučajevima u kojim je Zakonom o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10) predviđeno da skupština može razriješiti članove nadzornog odbora i prije isteka perioda na koji su imenovani.

Članu nadzornog odbora koji je imenovan umjesto razriješenog člana, kada se ne razrješava cijeli nadzorni odbor, mandat traje do isteka mandata članova nadzornog odbora koji su imenovani prilikom imenovanja cijelog nadzornog odbora, a nisu razriješeni.

Član 20.

Ukoliko ocjeni da rezultati poslovanja privrednog društva sa većinskim učešćem državnog kapitala nisu zadovoljavajući, Vlada Federacije Bosne i Hercegovine, na prijedlog nadležnog organa Federacije, može donijeti odluku o

davanju prethodne saglasnosti za smanjenje mjesečne naknade članovima nadzornog odbora.

Odlukom iz stava 1. ovog člana utvrđuje se smanjeni iznos mjesečnih naknada članova nadzornog odbora i period za koji će članovima nadzornog odbora biti isplaćivana naknada u smanjenom iznosu.

U skladu sa odlukom Vlade Federacije Bosne i Hercegovine iz stava 1. ovog člana, skupština privrednog društva sa većinskim učešćem državnog kapitala donosi odluku o smanjenju mjesečnih naknada članova nadzornog odbora.

Član 21.

Član nadzornog odbora imenovan ispred državnog kapitala, kojem je mandat istekao ili je razriješen dužnosti prije isteka mandata, dužan je izvršiti primopredaju dužnosti u roku i na način kako je to utvrđeno aktom nadležnog organa Federacije ili aktom skupštine tog privrednog društva.

Član 22.

Predsjednik nadzornog odbora privrednog društva sa većinskim učešćem državnog kapitala poziv za sjednice nadzornog odbora obavezno dostavlja i sindikatu tog privrednog društva.

U privrednim društvima sa većinskim učešćem državnog kapitala, pored predsjednika i članova nadzornog odbora, sjednicama nadzornog odbora može prisustvovati i predstavnik sindikata tog privrednog društva.

Kada nadzorni odbor odlučuje o pitanjima koja se odnose na zaposlenike privrednog društva, predstavnik sindikata iz stava 2. ovog člana u cilju zaštite interesa zaposlenika može iznositi prijedloge, davati pojašnjenja ili na drugi način učestvovati u raspravi na sjednicama nadzornog odbora s tim da ne može glasati prilikom donošenja odluka nadzornog odbora.

4. Uprava

Član 23.

Izbor kandidata za članove uprave privrednih društava sa većinskim učešćem državnog kapitala vrši organ utvrđen statutom tog privrednog društva (u daljem tekstu: nadležni organ privrednog društva) na osnovu objavljenog javnog konkursa u skladu sa unaprijed utvrđenim uslovima koje kandidati trebaju ispunjavati.

Nakon okončanog postupka izbora kandidata u skladu sa stavom 1. ovog člana nadležni organ privrednog društva sačinjava i dostavlja listu najuspješnijih kandidata nadležnom organu Federacije.

Vlada Federacije Bosne i Hercegovine, na prijedlog nadležnog organa Federacije iz stava 2. ovog člana, donosi odluku o davanju prethodne saglasnosti za imenovanje članova uprave.

U skladu sa odlukom Vlade Federacije Bosne i Hercegovine kojom je data prethodna saglasnost za imenovanje članova uprave, nadležni organ privrednog društva donosi odluku o imenovanju članova uprave.

Član 24.

Izuzetno, bez provođenja postupka iz člana 23. ovog zakona, Vlada Federacije Bosne i Hercegovine, na prijedlog nadležnog organa Federacije, može donijeti odluku o davanju prethodne saglasnosti za imenovanje vršilaca dužnosti članova uprave privrednog društva sa većinskim učešćem državnog kapitala koji se imenuju do okončanja postupka iz člana 23. ovog zakona, a najduže na period do šest mjeseci.

Vlada Federacije Bosne i Hercegovine može donijeti odluku u skladu sa stavom 1. ovog člana ukoliko ocjeni da je to potrebno radi obezbijeđenja uslova za nesmetano funkcionisanje uprave privrednog društva do okončanja postupka iz člana 23. ovog zakona.

U skladu sa odlukom Vlade Federacije Bosne i Hercegovine iz stava 1. ovog člana, nadležni organ privrednog društva sa većinskim učešćem državnog kapitala donosi odluku o imenovanju vršilaca dužnosti članova uprave na period do okončanja postupka iz člana 23. ovog zakona, a najduže na period do šest mjeseci, počev od dana stupanja na snagu odluke nadležnog organa o imenovanju vršilaca dužnosti članova uprave.

Član 25.

Razrješenje dužnosti prije isteka mandata jednog, više ili svih članova uprave privrednih društava sa većinskim učešćem državnog kapitala vrši nadležni organ privrednog društva na osnovu prethodne saglasnosti Vlade Federacije Bosne i Hercegovine.

Vlada Federacije Bosne i Hercegovine može dati prethodnu saglasnost iz stava 1. ovog člana u slučajevima u kojim je Zakonom o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10) predviđeno da nadležni organ privrednog društva može razriješiti članove uprave i prije isteka perioda na koji su imenovani.

Članu uprave privrednog društva sa većinskim učešćem državnog kapitala koji je imenovan umjesto razriješenog člana, u slučaju kada se ne razrješava cijela uprava privrednog društva, mandat traje do isteka mandata članova uprave privrednog društva koji su imenovani prilikom imenovanja cijele uprave privrednog društva, a nisu razriješeni.

Član 26.

Ukoliko ocjeni da rezultati poslovanja privrednog društva sa većinskim učešćem državnog kapitala nisu zadovoljavajući, Vlada Federacije Bosne i Hercegovine, na prijedlog nadležnog organa Federacije, može donijeti odluku o davanju prethodne saglasnosti za smanjenje mjesečnih plaća članova uprave.

Odlukom iz stava 1. ovog člana utvrđuje se smanjeni iznos mjesečnih plaća članova uprave i period za koji će članovima uprave biti isplaćivana plaća u smanjenom iznosu.

U skladu sa odlukom Vlade Federacije Bosne i Hercegovine iz stava 1. ovog člana, nadležni organ privrednog društva sa većinskim učešćem državnog kapitala donosi odluku o smanjenju mjesečnih plaća članova uprave.

Član 27.

Član uprave privrednog društva sa većinskim učešćem državnog kapitala kojem je mandat istekao ili je razrješen dužnosti prije isteka mandata dužan je izvršiti primopredaju dužnosti u roku i na način kako je to utvrđeno aktom nadležnog organa Federacije ili aktom nadležnog organa tog privrednog društva.

III – EVIDENCIJA I ADMINISTRATIVNA KONTROLA AKATA

Član 28.

Privredna društava sa većinskim učešćem državnog kapitala, dužna su nadležnom organu Federacije, radi evidencije dostavljati obavještenja o značajnim događajima za privredno društvo, i to: o namjeri osnivanja drugih privrednih društava smostalno ili zajedno sa drugim pravnim ili fizičkim licima, namjeri vršenja statusnih promjena, obustavljanju proizvodnje, blokadi računa, štrajku i drugim značajnijim događajima utvrđenim statutom privrednog društva.

Privredna društava sa većinskim učešćem državnog kapitala, dužna su odmah, a najkasnije u roku od tri dana od dana donošenja, nadležnom organu Federacije radi evidencije dostaviti primjerak: odluka o razrješenju i imenovanju članova nadzornog odbora i članova uprave, odluka o razrješenju i imenovanju članova nadzornog odbora i članova uprave zavisnih društava, polugodišnjeg i godišnjeg seta finansijskih izvještaja i godišnjeg konsolidovanog finansijskog izvještaja.

Privredna društva sa većinskim učešćem državnog kapitala, dužna su nadležnom organu Federacije dostavljati podatke iz st. 1. i 2. ovog člana i za privredna društva u čijem osnovnom kapitalu imaju više od 50% dionica ili udjela.

Član 29.

Privredna društava sa većinskim učešćem državnog kapitala, radi administrativne kontrole akata, dužna su nadležnom organu Federacije dostavljati: statut i druge akte predviđene propisom iz člana 31. stav 4. ovog zakona i sve izmjene i dopune ovih akata.

Član 30.

Privredna društava sa većinskim učešćem državnog kapitala, dužna su nadležnom organu Federacije, radi administrativne kontrole akata, dostavljati akte iz člana 29. ovog zakona najkasnije 15 dana od dana stupanja na snagu tih akata.

Akte iz člana 29. ovog zakona koji su doneseni prije stupanja na snagu ovog zakona, privredna društava sa većinskim učešćem državnog kapitala dužna su uskladiti sa odredbama ovog zakona i radi administrativne kontrole akata dostaviti nadležnom organu Federacije, najkasnije šest mjeseci od dana stupanja na snagu ovog zakona.

Član 31.

Administrativnu kontrolu akata privrednog društava sa većinskim učešćem državnog kapitala vrši nadležni organ Federacije koji u skladu sa Listom vrši ovlaštenja po osnovu učešća državnog kapitala u tom privrednom društvu.

Nadležni organ Federacije iz stava 1. ovog člana, nakon provedenog postupka administrativne kontrole akata, daje pismeno mišljenje o usklađenosti odgovarajućeg akta sa zakonima i podzakonskim aktima.

Ukoliko mišljenje iz stava 2. ovog člana sadrži primjedbe na kontrolisani akt, privredno društvo sa većinskim učešćem državnog kapitala, dužno je u ostavljenom roku otkloniti iznesene primjedbe ili dostaviti obrazloženje o razlozima radi kojih primjedbe nije moguće otkloniti u ostavljenom roku.

Postupak vršenja administrativne kontrole akata, spisak akata privrednih društava koji su predmet kontrole, rokovi za postupanje i druga pitanja u vezi administrativne kontrole akata utvrđuju se propisom koji donosi Vlada Federacije Bosne i Hercegovine na prijedlog Federalnog ministarstva energije, rudarstva i industrije.

IV – POSEBNE ODREDBE O POSTUPKU ZA UPIS I PROMJENU PODATAKA U REGISTRIMA

Član 32.

U registrima, postupak upisa i promjene podataka o privrednim društvima u kojim ovlaštenja po osnovu učešća državnog kapitala vrše organi Federacije Bosne i Hercegovine provodi se prema odredbama važećih zakona koji regulišu ovu oblast, ako ovim zakonom nije drugačije određeno.

Član 33.

Upis i promjena podataka u Registru vrijednosnih papira u Federaciji Bosne i Hercegovine o organima Federacije Bosne i Hercegovine koji u privrednim društvima vrše ovlaštenja po osnovu učešća državnog kapitala vrši se na osnovu odluka Vlade Federacije Bosne i Hercegovine iz člana 9. ovog zakona i zahtjeva organa Federacije Bosne i Hercegovine na koji se upis ili promjena podataka odnosi.

U postupku upisa i promjene podataka iz stava 1. ovog člana, organi Federacije Bosne i Hercegovine oslobođeni su plaćanja svih taksi i naknada.

Organi Federacije Bosne i Hercegovine oslobođeni su plaćanja svih taksi i naknada i u postupcima upisa i promjene podataka iz stava 1. ovog člana koji su započeti, a nisu okončani do stupanja na snagu ovog zakona.

Član 34.

Naplata potraživanja po osnovu neplaćenih taksi i naknada koje se plaćaju u postupcima upisa i promjene podataka u Registru vrijednosnih papira u Federaciji Bosne i Hercegovine ne može biti uslov za izvršenje zahtjevanog upisa i promjene podataka ako se postupak vodi po zahtjevu privrednih društava sa učešćem državnog kapitala.

Naplatu potraživanja iz stava 1. ovog člana, Registar vrijednosnih papira u Federaciji Bosne i Hercegovine može ostvarivati u sudskom ili drugom odgovarajućem postupku ali isključivo izvan postupaka upisa i promjene podataka u Registru vrijednosnih papira u Federaciji Bosne i Hercegovine koji se vode po zahtjevu privrednih društava sa učešćem državnog kapitala.

Član 35.

Registar vrijednosnih papira u Federaciji Bosne i Hercegovine će po službenoj dužnosti, umjesto Vlade Federacije Bosne i Hercegovine i/ili ministarstva Federacije Bosne i Hercegovine, izvršiti upis Federacije Bosne i Hercegovine kao vlasnika vrijednosnih papira dioničkih društava.

Registar vrijednosnih papira u Federaciji Bosne i Hercegovine će promjenu iz stava 1. ovog člana izvršiti u svim važećim upisima kojim su Vlada Federacije Bosne i Hercegovine i/ili ministarstva Federacije Bosne i Hercegovine evidentirani kao vlasnici vrijednosnih papira dioničkih društava, najkasnije u roku od 60 dana od dana stupanja na snagu ovog zakona.

Član 36.

Registri koji pored ostalih podataka evidentiraju i podatke koji se odnose na nadzorne odbore i uprave privrednih društava sa većinskim učešćem državnog kapitala, evidentiranje prvog imenovanja i svakog novog imenovanja i razrješenja članova nadzornih odbora i uprava ovih privrednih društava mogu vršiti isključivo ukoliko podnosilac zahtjeva za evidentiranje promjena pored ostalih potrebnih dokumenata dostavi i odgovarajući akt Vlade Federacije Bosne i Hercegovine iz čl. 15., 16., 19., 23., 24. i 25. ovog zakona.

V – KAZNE NE ODREDBE

Član 37.

Za prekršaj kaznit će se novčanom kaznom u iznosu od 2.000,00 KM do 3.000,00 KM odgovorno lice u privrednom društvu u kojem ovlaštenja po osnovu učešća državnog kapitala vrše organi Federacije Bosne i Hercegovine koje:

- 1) ne dostavi poziv za zakazanu skupštinu sa dnevnim redom i materijalima za svaku tačku dnevnog reda u skladu sa članom 13. stav 1. ovog zakona,
- 2) ne dostavi odgovarajući akt u skladu sa članom 28. ovog zakona,
- 3) postupa protivno odredbama čl. 29., 30. i 31. ovog zakona.

Član 38.

Za prekršaj kaznit će se novčanom kaznom u iznosu od 2.000,00 KM do 3.000,00 KM član nadzornog odbora privrednog društva u kojem ovlaštenja po osnovu učešća državnog kapitala vrše organi Federacije Bosne i Hercegovine, imenovan ispred državnog kapitala, koji:

- 1) postupi protivno članu 18. ovog zakona,
- 2) ne izvrši primopredaju dužnosti u skladu sa članom 21. ovog zakona.

Za prekršaj kaznit će se novčanom kaznom u iznosu od 2.000,00 KM do 3.000,00 KM član nadležnog organa privrednog društva u kojem ovlaštenja po osnovu većinskog učešća državnog kapitala vrše organi Federacije, imenovan ispred državnog kapitala, koji glasa za razrješenje i imenovanje članova uprave bez pribavljene prethodne saglasnosti Vlade Federacije Bosne i Hercegovine iz čl. 23., 24. i 25. ovog zakona.

Član 39.

Za prekršaj kaznit će se novčanom kaznom u iznosu od 2.000,00 KM do 3.000,00 KM član uprave privrednog društva sa većinskim učešćem državnog kapitala koji ne izvrši primopredaju dužnosti u skladu sa članom 27. ovog zakona.

VI – PRELAZNE I ZAVRŠNE ODREDBE

Član 40.

Nadzor nad provođenjem ovog zakona vrše organi Federacije Bosne i Hercegovine koji u skladu sa Listom vrše ovlaštenja u privrednim društvima sa učešćem državnog kapitala, svako u okviru svojih ovlaštenja.

Član 41.

Privredna društva u kojim ovlaštenja po osnovu učešća državnog kapitala vrše organi Federacije Bosne i Hercegovine dužna su uskladiti odredbe statuta sa ovim zakonom u roku od šest mjeseci od dana stupanja na snagu ovog zakona.

Član 42.

Na pitanja koja nisu regulisana ovim zakonom primjenjuju se odredbe Zakona o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10) i Zakona o javnim preduzećima u Federaciji Bosne i Hercegovine („Službene novine Federacije BiH“, br. 8/05, 81/08 i 22/09).

Član 43.

Stupanjem na snagu ovog zakona prestaje da važi Uredba o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala („Službene novine Federacije BiH“, broj 35/11).

Član 44.

Do stupanja na snagu odluke iz člana 9. stav 1. ovog zakona, primjenjuje se Odluka o utvrđivanju liste privrednih društava u kojim ovlaštenja po osnovu učešća državnog kapitala vrše organi Federacije Bosne i Hercegovine („Službene novine Federacije BiH“, broj 35/11).

Vlada Federacije Bosne i Hercegovine, dužna je donijeti propise iz čl. 8. i 31. ovog zakona, najkasnije u roku od šest mjeseci od dana stupanja na snagu ovog zakona.

Član 45.

Ovaj zakon stupa na snagu osmog dana od dana objavljivanja u „Službenim novinama Federacije BiH”.

O B R A Z L O Ž E N J E
UZ PRIJEDLOG ZAKONA O UPRAVLJANJU DRŽAVNIM KAPITALOM U
PRIVREDNIM DRUŠTVIMA U FEDERACIJI BOSNE I HERCEGOVINE

I – USTAVNI OSNOV

Ustavni osnov za donošenje ovog Zakona sadržan je u odredbi tačke c) Amandmana VIII na Ustav Federacije Bosne i Hercegovine prema kojoj je u isključivoj nadležnosti Federacije utvrđivanje ekonomske politike, uključujući planiranje i obnovu, te politiku korištenja zemljišta na federalnom nivou.

II – RAZLOZI ZA DONOŠENJE ZAKONA

Na nivou Federacije Bosne i Hercegovine, oblast vršenja ovlaštenja po osnovu učešća državnog kapitala u privrednim društvima do sada nije bila zakonski regulisana, pa tako pored ostalih značajnih pitanja do sada zakonom nije bilo utvrđeno koji su organi Federacije Bosne i Hercegovine ovlašteni za upravljanje državnim kapitalom u privrednim društvima sa učešćem državnog kapitala iz nadležnosti Federacije Bosne i Hercegovine, odnosno do sada nije postojao propis kojim bi Parlament Federacije Bosne i Hercegovine kao najviši organ vlasti na jasan i transparentan način dao ovlaštenja Vladi Federacije Bosne i Hercegovine da u ime Federacije Bosne i Hercegovine u privrednim društvima vrši ovlaštenja po osnovu učešća državnog kapitala, a kojim bi ujedno bio definisan sadržaj ovih ovlaštenja, kao i osnovni principi o načinu vršenja istih.

Postojanje pravne praznine u ovoj oblasti na nivou Federacije Bosne i Hercegovine u praksi je proizvelo niz štetnih posljedica koje pored ostalog dovode i do poteškoća u radu organa upravljanja privrednih društava sa učešćem državnog kapitala, dok svaka promjena u sastavu nadzornih odbora i uprava u privrednim društvima sa učešćem državnog kapitala u javnosti dovodi do rasprava po pitanju postojanja pravnog osnova za te promjene, iste su često praćene skupim i dugotrajnim sudskim postupcima sa neizvjesnim ishodom, a što konačno dovodi do pravne nesigurnosti i narušavanja poslovnog ugleda ovih privrednih društava, pogotovo kod stranih investitora i poslovnih partnera.

Potrebno je uzeti u obzir da je u Kantonu Sarajevo oblast upravljanja državnim kapitalom već duži period regulisana posebnim zakonom, te da je i u zemljama iz okruženja prisutna praksa da se upravljanje državnim kapitalom u privrednim društvima reguliše zakonom, pa je tako ova oblast u Republici Hrvatskoj predmet regulisanja Zakona o upravljanju državnim imovinom (NN 145/10).

Ukoliko se imaju u vidu navedene opštepoznate činjenice onda su sasvim razumljivi razlozi koji su opredjelili Vladu Federacije Bosne i Hercegovine da u parlamentarnu proceduru uputi tekst Zakona o upravljanju državnim kapitalom u privrednim društvima u Federaciji Bosne i Hercegovine.

Na nivou Federacije Bosne i Hercegovine predmetna oblast trenutno je jednim dijelom uređena odredbama Uredbe o vršenju ovlaštenja organa Federacije Bosne i

Hercegovine u privrednim društvima sa učešćem državnog kapitala („Službene novine Federacije BiH“, broj: 35/11) i to u dijelu koji se odnosi na učestvovanje u radu i odlučivanju skupština privrednih društava sa učešćem državnog kapitala, predlaganje članova nadzornih odbora privrednih društava sa učešćem državnog kapitala, razrješenje dužnosti prije isteka mandata članova nadzornih odbora privrednih društava sa učešćem državnog kapitala, davanje saglasnosti za imenovanje članova uprava privrednih društava i razrješenje dužnosti prije isteka mandata članova uprava privrednih društava sa većinskim učešćem državnog kapitala.

Poseban značaj ove oblasti vidljiv je i iz pregleda organa Federacije Bosne i Hercegovine i privrednih društava u kojim ovi organi vrše ovlaštenja po osnovu učešća državnog kapitala u skladu sa Odlukom Vlade Federacije Bosne i Hercegovine o utvrđivanju liste privrednih društava u kojim ovlaštenja po osnovu učešća državnog kapitala vrše organi Federacije Bosne i Hercegovine („Službene novine Federacije BiH“, broj: 35/11).

U skladu sa navedenom Odlukom Vlada Federacije Bosne i Hercegovine neposredno vrši ovlaštenja po osnovu učešća državnog kapitala u privrednom društvu ArcelorMittal Zenica d.o.o.

Federalno ministarstvo poljoprivrede, vodoprivrede i šumarstva vrši ovlaštenja po osnovu učešća državnog kapitala u privrednim društvima, i to:

1. "Fabrika duhana Mostar" d.d. Mostar,
2. „Fabrika duhana Sarajevo" d.d. Sarajevo,
3. JP "Bosanskohercegovačke šume" d.o.o. Sarajevo,
4. JP "Šume Herceg Bosne" d.o.o. Mostar.

Federalno ministarstvo finansija – Federalno ministarstvo financija vrši ovlaštenja po osnovu učešća državnog kapitala u privrednim društvima, i to:

1. Lutrija Bosne i Hercegovine d.o.o. Sarajevo,
2. "Sarajevo osiguranje" d.d. Sarajevo,
3. Union banka d.d. Sarajevo,
4. Bor Banka d.d. Sarajevo.

Federalno ministarstvo trgovine vrši ovlaštenja po osnovu učešća državnog kapitala u privrednom društvu "Šipad" Export – Import d.d. Sarajevo.

Federalno ministarstvo prometa i komunikacija vrši ovlaštenja po osnovu učešća državnog kapitala u privrednim društvima, i to:

1. Dioničko društvo BH TELECOM Sarajevo,
2. JP BH POŠTA d.o.o. Sarajevo,
3. JP Hrvatske telekomunikacije d.o.o. Mostar,
4. Hrvatske pošte d.o.o. Mostar,
5. JP Međunarodni aerodrom "SARAJEVO" d.o.o Sarajevo,
6. JP BH Airlines d.o.o. Sarajevo,
7. "CESTE" d.d. Mostar,
8. "Sarajevoputevi" d.d. Sarajevo,
9. JP Ceste Federacije BiH d.o.o. Sarajevo,
10. JP Autoceste Federacije BiH d.o.o. Mostar,

11. JP Željeznice Federacije BiH d.o.o. Sarajevo,
12. Zavod za saobraćaj d.o.o. Sarajevo,
13. Holding preduzeće "Putevi BiH" Sarajevo.

Federalno ministarstvo energije, rudarstva i industrije vrši ovlaštenja po osnovu učešća državnog kapitala u privrednim društvima, i to:

1. JP Elektroprivreda BiH d.d. – Sarajevo,
2. JP "Elektroprivreda HZ HB" d.d. Mostar,
3. "BH-Gas" d.o.o. Sarajevo,
4. Željezara "Zenica" d.o.o. Zenica,
5. Unis d.d. Sarajevo,
6. Energoinvest d.d. Sarajevo,
7. Energopetrol d.d. Sarajevo,
8. Aluminij d.d. Mostar,
9. Bosnalijek d.d. Sarajevo,
10. RMU Banovići d.d. Banovići,
11. Hidrogradnja d.d. Sarajevo,
12. IP "Krivaja" d.o.o. Zavidovići,
13. "KTK Visoko" d.d. Visoko,
14. "Terminali Federacije" d.o.o. Sarajevo,
15. Remontni zavod d.d. Travnik,
16. "Agrokomerc" d.d. Velika Kladuša.

Federalno ministarstvo energije, rudarstva i industrije, putem Federalne direkcije za namjensku industriju, vrši ovlaštenja po osnovu učešća državnog kapitala u privrednim društvima, i to:

1. BNT Tvornica mašina i hidraulike d.d. Novi Travnik,
2. Pretis d.d. Vogošća,
3. UNIS Ginex d.d. Goražde,
4. "Igman" d.d. Konjic,
5. "BINAS" d.d. Bugojno,
6. PS Vitezit d.o.o. Vitez,
7. "Zrak" d.d. Sarajevo,
8. Tehničko remontni zavod Hadžići d.d. Hadžići,
9. "UNIS – Pretis" d.o.o. Vogošća (Alatnica),
10. "UNIS - GROUP" d.o.o. Ilidža.

Federalno ministarstvo okoliša i turizma vrši ovlaštenja po osnovu učešća državnog kapitala u privrednim društvima, i to:

1. Javno preduzeće Nacionalni park "UNA" d.o.o. Bihać,
2. HUTP "SALUS HOTEL STELA" d.o.o. Neum.

U dosada provedenom postupku za donošenje ovog zakona Vlada Federacije Bosne i Hercegovine na 20. sjednici održanoj 04.10.2011. godine, utvrdila je Nacrt zakona o upravljanju državnim kapitalom u privrednim društvima u Federaciji Bosne i Hercegovine, te je isti radi razmatranja upućen u parlamentarnu proceduru.

Predstavnički dom Parlamenta Federacije Bosne i Hercegovine, na nastavku 7. sjednice održanom 27.10.2011. godine, prilikom razmatranja Nacrta zakona o upravljanju državnim kapitalom u privrednim društvima u Federaciji Bosne i

Hercegovine, usvojio je zaključak, broj: 01-02-1336/11 od 01.11.2011. godine, kojim je utvrđeno da predmetni Nacrt zakona može poslužiti kao osnova za izradu Prijedloga zakona, te je predlagač zadužen da organizuje i provede javnu raspravu u trajanju od 45 dana.

Dom naroda Parlamenta Federacije Bosne i Hercegovine, na 6. sjednici održanoj 10.11.2011. godine, prilikom razmatranja Nacrta zakona o upravljanju državnim kapitalom u privrednim društvima u Federaciji Bosne i Hercegovine, usvojio je zaključak, kojim je utvrđeno da predmetni Nacrt zakona može poslužiti kao osnova za izradu Prijedloga zakona.

Postupajući u skladu sa navedenim zaključcima, a u cilju sačinjavanja što kvalitetnijeg teksta Prijedloga zakona o upravljanju državnim kapitalom u privrednim društvima u Federaciji Bosne i Hercegovine, Federalno ministarstvo energije rudarstva i industrije preduzelo je niz aktivnosti, pa je tako dana 24.11.2011. godine u prostorijama Doma sindikata u Sarajevu, u organizaciji Saveza samostalnih sindikata Bosne i Hercegovine, održana Javna rasprava o predmetnom Nacrtu zakona, kojoj je prisustvovao značajan broj članova ovog Sindikata.

Javna rasprava o predmetnom Nacrtu zakona u organizaciji Federalnog ministarstva energije rudarstva i industrije i Privredne/gospodarske komore Federacije Bosne i Hercegovine, održana je dana 12.12.2011. godine u Sarajevu, dok je Javna rasprava u organizaciji Privredne komore Tuzlanskog kantona održana dana 07.12.2011. godine u Tuzli.

Dana 30.11.2011. godine, tekst Nacrta zakona sa obrazloženjem objavljen je i na službenoj web stranici Federalnog ministarstva energije rudarstva i industrije (www.fmeri.gov.ba), čime je isti postao dostupan najširem krugu zainteresovanih lica, koja su nakon uvida u objavljeni tekst imala mogućnost da na adresu Ministarstva dostave sve eventualne prijedloge i sugestije, radi razmatranja prilikom sačinjavanja Prijedloga zakona.

Pored navedenog, Federalno ministarstvo energije, rudarstva i industrije dostavilo je tekst Nacrta zakona o upravljanju državnim kapitalom u privrednim društvima u Federaciji Bosne i Hercegovine federalnim ministarstvima koja u privrednim društvima vrše ovlaštenja po osnovu učešća državnog kapitala, kao i svim vladama kantona u Federaciji Bosne i Hercegovine sa zahtjevom da kantonalne vlade tekst ovog Nacrta zakona upute opštinama i svim drugim relevantnim subjektima u svom kantonu, a radi dostavljanja eventualnih prijedloga i sugestija.

U cilju sačinjavanja što kvalitetnijeg teksta, Nacrt zakona je dostavljen i na adrese 26 privrednih društava u kojim Federalno ministarstvo energije, rudarstva i industrije vrši ovlaštenja po osnovu učešća državnog kapitala, Komisiji za vrijednosne papire Federacije Bosne i Hercegovine i Registru vrijednosnih papira u Federaciji Bosne i Hercegovine.

Nakon što su okončane sve navedene aktivnosti, uz uvažavanje najvećeg broja prikupljenih i obrađenih prijedloga i sugestija, posebno prijedloga i sugestija iznesenih u parlamentarnoj raspravi, sačinjen je tekst Prijedloga zakona o upravljanju

državnim kapitalom u privrednim društvima u Federaciji Bosne i Hercegovine, sa obrazloženjem po pojedinim poglavljima kako slijedi:

Opšte odredbe, obuhvataju čl. 1. do 3. kojim se određuje predmet regulisanja zakona, značenje pojmova i utvrđuje se da se ovim zakonom isključivo propisuje vršenje ovlaštenja po osnovu učešća državnog kapitala u privrednim društvima u kojim ova ovlaštenja vrše organi Federacije Bosne i Hercegovine, dok je za privredna društva u kojim ovlaštenja po osnovu učešća državnog kapitala vrše opštine, gradovi i kantoni Federacije Bosne i Hercegovine propisano da vršenje tih ovlaštenja uređuju svojim propisima općine, gradovi i kantoni Federacije Bosne i Hercegovine, svako u okviru svojih nadležnosti.

Vršenje ovlaštenja u privrednim društvima sa učešćem državnog kapitala, obuhvata čl. 4. do 27. sa odjeljcima: Osnivanje i način vršenja ovlaštenja u privrednim društvima sa učešćem državnog kapitala, Odlučivanje na skupštini, Nadzorni odbor i Uprava.

Osnivanje i način vršenja ovlaštenja u privrednim društvima sa učešćem državnog kapitala obuhvata čl. 4. do 10. kojim se uspostavlja zakonski osnov za osnivanje novih privrednih društava ali isključivo privrednih društava sa 100% učešćem državnog kapitala, te se uspostavlja zakonski osnov za izradu Strategije i Plana upravljanja državnim kapitalom u privrednim društvima iz nadležnosti Federacije Bosne i Hercegovine.

Prema Prijedlogu zakona Strategijom bi se određivali srednjoročni ciljevi i smjernice upravljanja državnim kapitalom u privrednim društvima iz nadležnosti Federacije Bosne i Hercegovine, a istu bi donosio Parlament Federacije Bosne i Hercegovine, dok bi se Planom određivali kratkoročni ciljevi i smjernice upravljanja državnim kapitalom u privrednim društvima iz nadležnosti Federacije Bosne i Hercegovine i mjere za provođenje Strategije.

Način vršenja ovlaštenja u privrednim društvima sa učešćem državnog kapitala obuhvata čl. 9. i 10. kojim se daje nadležnost Vladi Federacije Bosne i Hercegovine da u privrednim društvima sa učešćem državnog kapitala iz nadležnosti Federacije Bosne i Hercegovine, neposredno ili putem federalnih organa uprave, vrši ovlaštenja po osnovu učešća državnog kapitala.

Članom 9. Vladi Federacije Bosne i Hercegovine daje se ovlaštenje da posebnom odlukom utvrđuje listu privrednih društava iz nadležnosti Federacije Bosne i Hercegovine u kojim ovlaštenja po osnovu učešća državnog kapitala vrše organi Federacije Bosne i Hercegovine, a što je i sada prisutno rješenje jer je trenutno navedena lista utvrđena Odlukom Vlade Federacije Bosne i Hercegovine o utvrđivanju liste privrednih društava u kojim ovlaštenja po osnovu učešća državnog kapitala vrše organi Federacije Bosne i Hercegovine („Službene novine Federacije BiH“, broj: 35/11).

Istom odredbom utvrđen je i postupak izmjena i dopuna navedene odluke, čime je ujedno normiran i postupak prenosa vršenja ovlaštenja po osnovu učešća državnog kapitala u privrednim društvima sa učešćem državnog kapitala u Federaciji Bosne i Hercegovine, sa jednog na drugi nivo vlasti.

Odlučivanje na skupštini obuhvata čl. 11. do 14. kojim se, u skladu sa važećim odredbama Zakona o privrednim društvima („Službene novine Federacije BiH“, br. 23/99, 45/00, 2/02, 6/02, 29/03, 68/05, 91/07, 84/08, 88/08, 7/09 i 63/10) i na isti način kao što je ova materija trenutno regulisana odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala, propisuje način učestvovanja u radu i odlučivanju skupština privrednih društava sa učešćem državnog kapitala, obavezan sadržaj punomoći koju izdaje organ Federacije Bosne i Hercegovine koji pravo učestvovanja u radu i odlučivanju skupštine privrednog društava sa učešćem državnog kapitala ostvaruje putem punomoćnika, način dostavljanja punomoći privrednom društvu, opoziv punomoći, dostavljanje materijala za skupštinu i druga pitanja bitna za nesmetano odlučivanje i učestvovanje u radu skupštine privrednog društva sa učešćem državnog kapitala.

Nadzorni odbor obuhvata čl. 15. do 22. kojim je, u skladu sa važećim odredbama Zakona o ministarskim, vladinim i drugim imenovanjima Federacije Bosne i Hercegovine ("Službene novine Federacije BiH", br. 12/03 i 34/03) i na isti način kao što je ova materija trenutno regulisana odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala, utvrđen postupak izbora i predlaganja kandidata za članove nadzornih odbora ispred državnog kapitala na mandat od četiri godine, postupak predlaganja kandidata za članove nadzornog odbora ispred državnog kapitala koji se imenuju na period do šest mjeseci, ograničenja za predlaganje i imenovanje članova nadzornih odbora ispred državnog kapitala, dužnost članova nadzornih odbora imenovanih ispred državnog kapitala da dostavljaju izvještaje o radu, smanjenje mjesečne naknade članovima nadzornog odbora u slučaju da rezultati poslovanja privrednog društva sa većinskim učešćem državnog kapitala nisu zadovoljavajući, razrješenje dužnosti prije isteka mandata članova nadzornih odbora privrednih društava imenovanih ispred državnog kapitala i druga bitna pitanja.

Uprava obuhvata čl. 23. do 27. kojim je, na isti način kao što je ova materija trenutno regulisana odredbama Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala, propisan postupak izbora kandidata i imenovanja članova uprave privrednih društava sa većinskim učešćem državnog kapitala na mandat od četiri godine, postupak izbora kandidata i imenovanja članova uprave privrednih društava sa većinskim učešćem državnog kapitala na period do šest mjeseci, razrješenje dužnosti prije isteka mandata članova uprave privrednih društava sa većinskim učešćem državnog kapitala, smanjenje mjesečnih plaća članova uprave u slučaju da rezultati poslovanja privrednog društva sa većinskim učešćem državnog kapitala nisu zadovoljavajući i druga bitna pitanja.

Evidencija i administrativna kontrola akata, obuhvata čl. 28. do 31. kojim se uspostavlja mehanizam za efikasniju kontrolu poslovanja i zakonitosti unutrašnje organizacije i internih akata privrednih društava, ali isključivo privrednih društava sa većinskim učešćem državnog kapitala.

Članom 28. utvrđena je obaveza privrednih društava sa većinskim učešćem državnog kapitala da organu Federacije Bosne i Hercegovine koji u tom društvu vrši ovlaštenja po osnovu većinskog učešća državnog kapitala dostavlja obavještenja o značajnim događajima za privredno društvo ili za njegova zavisna društva, a u cilju

obezbjeđenja dovoljnog broja podataka putem kojih bi nadležni organ mogao što efikasnije pratiti stanje, kako u tom privrednom društvu, tako i u cjelokupnoj oblasti za koju je osnovan.

Članovima 29. do 31. uređuje se postupak administrativne kontrole akata koji obuhvata kontrolu usklađenosti odgovarajućih akata privrednih društava sa većinskim učešćem državnog kapitala i akata zavisnih društava sa zakonima, i podzakonskim aktima. Istovremeno putem navedene kontrole omogućilo bi se i usaglašavanje sadržaja akata različitih privrednih društava sa većinskim učešćem državnog kapitala u Federaciji Bosne i Hercegovine u kojim su trenutno unutrašnja organizacija, poslovanje i druga bitna pitanja regulisana na različite načine, pri čemu je potrebno napomenuti da je mogućnost administrativne kontrole akata privrednih društava predviđena i propisima EU (Direktiva 2009/101/EC od 16.09.2009. godine, Poglavlje 4.).

Posebne odredbe o postupku za upis i promjenu podataka u registrima, obuhvataju čl. 32. do 36. kojim se propisuje poseban postupak upisa i promjene podataka u registrima o privrednim društvima u kojim ovlaštenja po osnovu učešća državnog kapitala vrše organi Federacije Bosne i Hercegovine, pri čemu se pod registrima podrazumjevaju: Registar poslovnih subjekata koji vode nadležni registarski sudovi u Federaciji Bosne i Hercegovine, Registar vrijednosnih papira u Federaciji Bosne i Hercegovine i drugi registri u kojim se evidentiraju podaci o privrednim društvima.

Članom 33. utvrđeno je na osnovu koje isprave se u Registru vrijednosnih papira u Federaciji Bosne i Hercegovine vrši promjena podataka o organima Federacije Bosne i Hercegovine koji u privrednim društvima vrše ovlaštenja po osnovu učešća državnog kapitala, što trenutno u praksi predstavlja velike poteškoće, te da su u postupku upisa i promjene ovih podataka organi Federacije Bosne i Hercegovine oslobođeni plaćanja svih taksi i naknada, kao što su organi Federacije Bosne i Hercegovine oslobođeni plaćanja svih taksi i naknada i u drugim postupcima.

Prema članu 34. ukoliko se postupak za upis i promjenu podataka u Registru vrijednosnih papira u Federaciji Bosne i Hercegovine vodi po zahtjevu privrednog društva sa učešćem državnog kapitala, to privredno društvo nije oslobođeno plaćanja taksi i naknada, ali plaćanje taksi i naknada ne može biti uslov za izvršenje zahtjevanog upisa i promjene podataka, a to iz razloga što je trenutno prisutna praksa da se upis i promjena podataka po zahtjevu privrednih društava sa učešćem državnog kapitala koja se nalaze u teškoj ekonomskoj situaciji uslovljavaju plaćanjem visokih naknada i taksi čime se dovodi u pitanje nastavak nesmetanog poslovanja tih privrednih društava koja imaju veliki broj zaposlenika.

Članom 35. predviđeno je ujednačavanje svih upisa u Registru vrijednosnih papira u Federaciji Bosne i Hercegovine koji se odnose na naziv vlasnika vrijednosnih papira privrednih društava u kojim ovlaštenja po osnovu većinskog učešća državnog kapitala vrše organi Federacije Bosne i Hercegovine.

Članom 36. propisano je da registri koji pored ostalih podataka evidentiraju i podatke koji se odnose na nadzorne odbore i uprave privrednih društava sa većinskim učešćem državnog kapitala, evidentiranje prvog imenovanja i svakog

novog imenovanja i razrješenja članova nadzornih odbora i uprava ovih privrednih društava mogu vršiti isključivo ukoliko podnosilac zahtjeva za evidentiranje promjena pored ostalih potrebnih dokumenata dostavi i odgovarajući akt Vlade Federacije Bosne i Hercegovine.

Kaznene odredbe, obuhvataju čl. 37. do 39. kojim su propisni prekršaji sa utvrđenim novčanim kaznama u slučaju kršenja odredaba ovog zakona i to za odgovorna lica u privrednim društvima, članove nadzornih odbora imenovane ispred državnog kapitala i članove uprave privrednih društava sa većinskim učešćem državnog kapitala.

Prelazne i završne odredbe, obuhvataju čl. 40. do 45. kojim je propisan nadzor nad provođenjem ovog zakona, rok za usklađivanje statuta privrednih društava sa učešćem državnog kapitala sa odredbama ovog zakona, primjena odredaba Zakona o privrednim društvima na pitanja koja nisu regulisana ovim zakonom, prestanak važenja Uredbe o vršenju ovlaštenja organa Federacije Bosne i Hercegovine u privrednim društvima sa učešćem državnog kapitala („Službene novine Federacije BiH“, broj 35/11) i stupanje na snagu.

III – FINANSIJSKA SREDSTVA

Za provođenje ovog zakona nije potrebno obezbijediti dodatna sredstva u Budžetu Federacije Bosne i Hercegovine.